

Vg
5815



QK. 193. (2)

QK 193.

Vg
5815

Vom Christlichen
abschied aus diesem tödlichen leben
des Ehrwürdigen Herrn D. Mar-
tini Lutheri / bericht / durch D.
Iustum Jonam / M. Michae-
lem Celium / vnd ander die
dabey gewesen / Kurtz
zusamen gezogen.

Gedruckt zu Wittenberg
durch Georgen
Kham.

Anno M. D. XLVI.

BIBLIOTHECA
PONICKAVIANA





IVLIX. C. 82. 0003

UNIVERSITÄT
MARTINI
LUTHERI



A XVIII. tag Januarij/ist aus er-
forderung/ der Edelen vnd Wolgebor-
nen Grauen vnd Herrn zu Mansfeld
der Ehrwürdige Herr D. Martinus Luth-
ther von Wittemberg ausgezogen / vnd die
erste nacht zu Bitterfeld gelegen.

Vnd ist aber die erforderlig D. Doctoris
Martini von wolgedachten Grauen / aus
der vrsachen geschehen / das sich zwischen
ihren gnaden viel / vnd grosse irrungen vnd
gebrechen/ezliche zeit her erhalten/Daraus
der Herrschafft Mansfeld /allerley weite-
rung zubefahren gewesen / Derhalben die
Grauen samptlich D. Doctorem Marti-
num/als der aus ihrer gnaden herrschafft/
nemlich von Eisleben bürdig / gebeten / sich
mit der vnterhandlung zubeladen / vnd zu
vleißigen/soniel möglichen die sachen zuvertra-
gen vnd zuvergleichem. Wiewol aber D.
Doctor Martinus / sich inn solche Weltli-
che hendel einzulassen nicht gepflegt / sonder
seines beruffs je vnd atwegen/mit predigen/
lesen/schreiben/ vnd andern / wie meniglich
bewust/höchstes vleis gewartet/ So hat er
A ij doch

Soch/ seines Vaterlands halben/ damit das
selbige zu einigkeit gebracht/ weitung vor/
kommen/ vnd die Graffen miteinander freund
lich möchten versünet vnd vortragen wer/
den/ diese rheiße nicht wegern/ noch abschla/
hen wollen / Ob es ihme wol solcher zeit zu
reisen/ vnd sich mit diesen dingen zubeladen/
ganz vngelegen/ auch beschwerlich/ vnd wi
der seinen gebrauch / gewesen. Ist der wegen
den tag wie obstehet/ von Wittemberg/ inn
dem namen des Allmechtigen/ nach Eislez
ben gerheiset.

Den xxiiij. tag Januarij / ist er vmb eilff
vhr vor mittag zu Hall einkomen / vnd bey
D. Jonas zu herberg gelegen.

Den xxv. xxvj. xxvij. Januarij / ist er zu
Hall blieben/ verhindert durchs wasser/ vnd
hat den xxvj. tag / welcher war der Dien/
stng nach Conuersionis Pauli/ alda inn vn/
ser Lieben Frauen Kirchen gepredigt/ aus
den Actis Apostolorum / von Pauli beke
rung.

Auff den Donnerstag / welcher war der
xxviii. Januarij / ist er von Hall aus / vber
das wasser / sampt seinen dreien Söhnen
vnd

vnd D. Jonas/warlich etwas mit gefahr/
auffm Kaan/vber das wasser gefaren/das
er auch selbest sprach zu Doctor Jonas/Lie
ber D. Jonas/wer das dem Teuffel nicht
ein fein wolgefallen/wenn ich D. Marti
nus/mit dreien Sönen vnd euch/jnn dem
wasser ersöff/vnd volgends nach Eisleben
gerheiset.

Vnd nach dem er/auff der Grentz/mit
hundert vnd dreizehen Pferden angeno
mē fur Eisleben kam/wurder fast schwach
im wagen/also/das man sich auch seines le
bens befahret/Doch als man ihn jnn der
Herberge mit warmen thichern gerieben/as
vnd tranck er den abend/vnd war zu friez
den/klagt sich nicht mehr/Aber zuuor auff
dem wagen/wie ihn die franckheit ansties/
saget er/Das thut mir der Teuffel alweg/
wenn ich etwas grosses vorhab/vnd aus
richten sol/das er mich zuuor/also versucht
vnd mit einer solchen Tentation angreiffet.

Von dem xxix. tag Januarij an/bis
auff den xvij. tag Februarij Inclusive/ist er
zu Eisleben gewesen jnn der handlung/vnd
neben der handlung vier predigt gethan/

2 iij ein

ein mal öffentlichen vom Priester so an dem Altar die Communion gehalten die absolution empfangen / vnd zwar Communicirt / vnd bey der andern Communion / Nemlich Sontags am tag Valentini / hat er zween Priester / nach Apostolischem brauch selb ordiniert vnd geweiht.

Es sind auch von dem xxviij. Januarij an / bis auff den xvij. Februarij / gar viel seiner tröstlicher rede von ihm gehört / da er oft seines alters / vnd das er sich dahem / wenn er gen Wittenberg widder kommen würde / zur ruge legen / gedacht hat / Auch viel wichtiger tröstlicher Sprüche der Schrift / vber tisch / inn bey sein der Grafen / vnd vnser ander / die wir mit ihm zu tisch sassen / ausgelegt / welche zu seiner zeit sollen inn einem sonderlichen verzeichnis ausgehen.

Vnd sonderlich alle abend / die xxj. tage durch / ist er aus der grossen stuben vom tisch inn sein stüblin gangen vmb acht vhr / oder oft dafür / auch die abend alle / ein gute weil im fenster gestanden / vnd sein gebet zu Gott so ernstlich vnd emsig gethan / das wir / D.
Jonas /

Jonas / M. Celiuſ / Ambroſiuſ ſein die
ner / Joannes Aurifaſer Vinarienſiſ (nach
dem wir ſtil ſwaren) offt etlich wort gehö-
ret / vns verwundert / Darnach hat er ſich
auſ dem fenſter vmbgewand / frölich (als
hette er aber eine laſt abgelegt) vnd gemeinig-
lich noch ein halbe viertel ſtund mit vns ge-
redt / als denn zu bett gangen.

Auff den Mitwochen aber den xvij. Fe-
bruarij / haben die Herrn vnd Grauen D.
G. S. ſelb gebeten / vnd wir alle / er wolt
vor mittag nicht jnn die groſſen ſtubē zu den
handlung gehen / ſondern rugen / Da hat
er jnn ſeinem ſtäblin auff einem ledern bett-
lein gelegen / auch im ſtäblin vmbgangen
vnd gebett / Nichts deſte weniger aber / ab-
bends vnd morgends daniden jnn der groſ-
ſen ſtuben / auff ſeinem ſtul / ſich an tiſch ge-
ſetzt / vnd daſſelbige abendmal zuvor (als er
den morgen kurz vor drey vhr / ſeliglich jnn
Gott verſchieden iſt) hat er viel wichtige
wort vnd rede / vom tod vnd künſtlichem e-
wigem leben geredt / vnter andern geſagt /
Ach lieber Gott / xx. jar iſt ein geringe zeit /
noch macht die kleine zeit / die Welt wiſſt /
weil

wenn Man vnd weib nicht nach Gottes ge
schöpff vnd ordnung zusammen kernen / wie
gar ist's eitel Creatio / Gott samlet ihm seine
Christlich Kirch ein gros teil aus den klei
nen kindern / Dann ich glenbe / wann ein
kind von einem jar stirbt / das allezeit tau
sent / oder zweytausent jerige kinder mit ihm
sterben / Aber wenn ich D. Martinus drey
sechziger sterb / so halt ich nicht / das ihr sech
zig oder hundert durch die Welt mit mir ster
ben / dann die Welt wird jzund nicht alt /
Wolan / wir alten müssen darumb so lang le
ben / das wir dem Teuffel inn hindern se
hen / souiel bosheit / vntrew / elend der Welt
erfahren / auff das wir zeugen sein / das der
Teuffel so ein böser geist gewesen / Mensch
lich geschlecht ist / wie ein schaffstal / der
schlachtschaff.

Auch gedachte / der Herr Doctor den
selben letzten abend vber tisch / dieser fragen /
nemlich / Ob wir inn ihener seligen / künfftig
gen ewigen versammlung vnd Kirchen / auch
einander kennen würden / Vnd da wir vlei
ssig baten des berichts / da sprach er / Wie
thet Adam / er het Euan sein lebtag nie ge
sehen /

sehen / lag da vnd schlieff / Als er aber auff-
wachte / da saget er nicht / Wo kompstu her?
Was bistu? Sondern / das fleisch ist von
meinem fleisch / vnd das bein von meinen bei-
nen genommen. Wo her wußt er das / das dis
weib aus keinem stein gesprungen were: Da
her geschach es / das er des heiligen Geistes
vol / vnd im warhafftigen erkentnis Gottes
war / Zu dem erkentnis vnd bild / werden
wir inn jenem leben widderumb inn Christo
ernewert / das wir Vater / Mutter / vnd vns
vnternander kennen werden / von ange-
sicht besser / dann wie Adam vnd Eua.

Nicht lang nach diesen worten / ist er
auffgestanden / vnd inn sein stüblin gan-
gen / vnd sind ihm seine zwen kleine Söne
Martinus / Paulus / M. Celius bald nach
gefolget / hat er sich seiner gewonheit nach
im stüblin inn das fenster gelegt zubeten /
ist M. Celius widder herab gangen / vnd
ist Joannes Aurifaber Vnariensis hin
auff komen / hat der Doctor gesagt / Mir
wird aber weh vnd bange / wie zuuor / vmb
die brust / Da hat Johannes gesagt / Ich
hab gesehen / da ich der jungen Herrn Praes
B ceptor

ceptor war / wen̄ ihnen vmb die brust / oder
sonst vbel ward / das inē die Greuin einhorn
gegebē hat / Wolt jhrs habē / wil ich es holē /
Hat der Doctor ja gesagt / In dem ist Johan
nes / ehe ehr zur Greuin gangen / eilend herunt
ter gelauffen / vnd rufft D. Jonas / vnd M.
Celio / die vber zwey Vater vnser lang / nicht
danidē gewesen / vñ schnel hinauff gelauffē.

Als wir hinauff kamen / hat er sich aber
hart geklaget vmb die brust / Da wir von
stund an (seinem gebrauch nach / wie er das
heim gepfleget) mit warmen tüchern ihn
wol gerieben / das er empfand / vnd sprach
ihme were besser / Kam Graff Albrecht selb
ber gelauffen mit M. Johan / brachten das
Einhorn / vnd sprach der Graff / Wie ges
hets O lieber Herr Doctor : Darauff der
Doctor sprach / Es hat kein not / gnediger
Herr / es begint sich zu bessern / Da hat ihn
Graff Albrecht selb / das Einhorn geschas
bet / Vnd nach dem der Doctor besserung fū
let / ist er widder von ihm gangen / seiner Re
the einer / Conrad von Wolfframs dorff /
neben vns D. Jona / M. Celio / Johan / Am
brosio bey ihm gelassen / Da hat man auff s
Doctors

Doctors begeren/das geschabt einhorn inn
einē löffel mit wein zwir ihm eingegeben/da
Conrad von Wolfframs dorff zuuor selbst
ein löffel voldamit der Doctor deste weni/
ger schew hettgenomen.

Da leget er sich vngesehrlich vmb ir. vhr
auff's Kugebetlin/vnd sprach/Wenn ich ein
halbs stündlin könd schlumen / hofft ich es
solt alles besser werdē/ Da hat er anderthal
bestund bis auff 1 vhr/sanfft vnd natürlich
geschlaffen/sind wir D. Jonas/vñ M. Mi
chael Celius / sampt seinem diener Ambrosio
vnd seinen zweien kleinen Sönen/Martino
vnd Paulo/bey ihm blieben.

Als er aber gleich jñ puncto 1. vhr auff wa
cht / sprach er / Sihe /sitz ihr noch/ möchte
ihr euch nicht zu bet legē/ Antworteten wir/
Nein herr Doctor / jzt sollen wir wachen/
vñ auff euch wartē/Mit dem begert er auff
vnd stund auch vom Kugebetlin auff / vnd
gieng jñ die kamer hart an der stubē/die mit
fenstern für aller lufft verwaret/vñ wiewol
er da nichts klaget/ doch da er vber die sch/
wellen der kamer gieng / sprach er / Walts
Gott/ich gehe zu bet. In manus tuas cōmendo
spiritū meū, redemisti me Dñe Deus veritatis.

B ij Als

Als er nu zu bett gieng/welches wol zube
reit/mit warmen bretten vnd küssen /legt er
sich ein / gab vns allen die hand / vnd gute
nacht/vñ sprach/D. Jona vñ M. Celi/vñ
jhr andern / betet für vnsern Herrn Gott /
vñ sein Euangelium/das jm wolgehe/Den
das Concilium zu Trent / vnd der leidige
Bapst/zürnen hart mit ihm/ Da ist die nach
cht bey ihme jnn der kamer blieben D. Jo
nas/seine zwen söne/ Martinus/Paulus /
sein diener Ambrosius / vnd ander diener.

Diese xxj. tag / hat man alle nacht liechte
jnn der kamer gehalten/dieselbige nacht aber
auch das stüblin lassen warm halten / Da
hat er wol geschlaffen/mit natürlichem sch
nauben/bis der Zeiger eins geschlagen/ist er
erwacht / vnd seinen diener Ambrosium ge
ruffen/ime die stuben einzuheizen/Als aber
dieselbige die ganze nacht warm gehalten/
vnd Ambrosius der diener widder kam /
fragt ihn D. Jonas / ob er wider schwachheit
empfinde / sprach er / Ah Herre Gott/ wie
ist mir so wehe / Ah lieber Doctor Jonas/
ich achte / ich werde hie zu Eisleben (da ich
gebörn

geborn vnd getaufft bin) bleiben / Darauff
D. Jonas / vnd Ambrosius der diener / ge-
antwort / Ah Reuerende Pater / Gott vns-
ser Himlischer vater wird helffe durch Chri-
stum / den ihr gepredigt habt. Da ist er one
hülffe / oder handleiten / durch die kamer inn
das stüblin gangen / Auch im schrit vber
die schwellen gesprochen / inn massen / wie er
zu bett gangen / diese wort / In manus tuas
commendo spiritum meum, Redemisti me
Domine DEVS veritatis. Auch ein mal oder
zwei im stüblin hin vnd wider gangen / Le-
get sich darnach auff das ruge betlin / vnd
klagt / es drück ihn vmb die brust sehr hart /
Aber doch schonete es noch des hertzen.

Da hat man ihn / wie er begert / vnd zu
Wittemberg im brauch gehabt / mit war-
men tüchern gerieben / vnd ihm küssen
vnd pful gewermet / Denn er sprach / Es
hülff ihnen wol / das man ihn warm hielt.

Vor diesem allen / vnd da der Doctor nu
sich auff's rugebettlin gelegt / kam M. Celis-
us / aus seiner kamer / hart an der vnsern ge-
lauffen / vnd bald nach ihm Johannes
Aurifaber / Da hat man ganz eilend den

B ij Wirt

Wirt/Johan Albrecht/den Stadtschreiber/
vnd sein weib auffgeweckt / dergleichen die
zwen Medicos jnn der Stad / welche alle
(nach dem se nahe woneten) jnn einer vier/
tel stund gelauffen kamen.

Erstlich der Wirt mit seinem weibe/
Darnach M. Simon Wild/ein arzt / vnd
D. Ludwig/ein Medicus / bald darauff
Grass Albrecht mit seinem gemahl / Welche
Grenin allerley würgz vñ labfal mit bracht/
vnd on vnterlas mit allerley stercken jn zuer
quickē sich beyleiffigt / Aber jñ dem allē / sagt
der Herr Doctor / Lieber Gott / mir ist sehr
weh vñ angst / Ich far dahin / ich werde nu
wol zu Eisleben bleiben / Da tröstet ihn D.
Jonas / vnd M. Celius / vnd sprachen / Res
uerende Pater / Küffet ewern lieben Herrn
Ihesum Christum an / vnsern hohen Prie/
ster / den einigen Nitler / Ihr habet einen gro
ssen guten schweis gelassen / Gott wird gna
de verleihē / das es wird besser werden / Da
antwort er / vnd sprach / Ja es ist ein kalt to
der schweis / ich werde meinen geist auffges
ben / denn die franckheit mehret sich / Dar
auff fieng er an / vnd sprach.

O mein

O mein Himlischer vater / ein
Gott vnd vater vnsers Herrn Ihesu
Christi / du Gott alles trostes / ich
dancke dir / das du mir deinen lieben
Son Ihesum Christum offenbart
hast / an den ich glaube / den ich gepre-
digt vnd bekant hab / den ich geliebet
vnd gelobet hab / welchen der leidige
Papist / vnd alle Gottlosen schenden /
verfolgen / vnd lestern / Ich bitte dich
mein Herr Ihesu Christe / las dir
mein * seelichen beuohlen sein. O
Himlischer vater / ob ich schon diesen
leib lassen / vnd aus diesem leben hin-
weg gerissen werden mus / So weis
ich doch gewis / das ich bey dir ewig
bleiben / vnd aus deinen henden mich
niemandts reissen kan.

*
(seelichen
sprach er
eigentlich)
one zweuel/
sich für Gott
zu demüti-
gen / Als solt
er sagen / wie
ein arme Cre-
atur bin ich
gegen dir / du
grosse vñend-
liche ewige
Majestet.

Weiter

Weiter sprach er auch / Sic DEVS dilexit mundum, vt vnigenitum fil. um suum daret, vt omnis, qui credit in eum non pereat, sed habeat vitam aeternam. Vnd die wort aus dem lxxij. psalm / DEVS noster DEVS saluos faciendi, & DOMINVS est Dominus educendi ex morte. Das ist deudsch / Wir haben einen Gott des Heils / vnd ein **HERREN** / Herrn / der mitten aus dem Tode vns furet.

In dem versucht der Magister noch ein seer köstliche artzney / die er zur not allzeit in seiner taschen hatte / des der Doctor ein löffel vol ein nam / Aber er sprach abermal / Ich fahr dahin / meinē Geist werd ich auffgebē / Sprach derhalb dreimal sehr eilend auffeinander / Pater, in manus tuas commendo spiritum meum, Redemisti me DEVS veritatis. Als er nu seinen Geist inn die hende Gottes des Himlischen vaters befohlen hatte / sieng er an still zu sein / Man rüttelt aber / rieb / küßlet / vnd rieff ihm / Aber er that die augen zu / antwort nicht / Da streich Graff Alsbrechts gemahl / vñ die Erzte ihm den puls mit allerley sterckwassern / welche ihm die
Doctorin.

Doctorin geschickt / vnd er selbest pflieget zu
gebrauchen.

In dem er aber so still ward / rieß
ihm D. Jonas / vnd M. Celius starck ein/
Reuerende Pater / Wollet ihr auff Chris
stum / vnd die Lehre / wie ihr die gepredigt /
bestendig sterben / Sprach er / das man es
deudlich hören kund / Ja. Mit dem wand
er sich auff die rechte seiten / vnd fieng an zu
schlafen / fast ein viertel stunde / das man
auch der besserung hoffet / Aber die Erzte
vnd wir / sagten alle / Dem schlaff were nicht
zunertrawen / leuchteten ihm mit liechten
vleißig vnter das angesicht.

In dem kam Graff Hans Heinrich
von Schwarzenburg / sampt seinem Ges
mahl auch darzu / Nach dem bald erbleicht
der Doctor sehr vnter dem angesicht / wur
den ihm füsse vnd nase kalt / Thet ein
tieff / doch senfft / odem holen / mit welchem
er seinen Geist auffgab / mit stille vnd grosser
gedult / das er nicht mehr ein finger noch
bein reget / Vnd kond niemands mercken
das zeugen wir fur Gott auff vnser gewis
sen einige vnrüge / quellung des leibes / oder
C schmerzen

Schmerzen des todes / Sondern entschlieff
friedlich vnd sanfft im Herrn / wie Simeon
singer.

loh. 2. v. 57.

Das wol der spruch Joannis am viij
an ihm war ward / Warlich sag ich euch /
Wer mein wort helt / wird den Tod nim-
mer mehr sehen ewiglich / Welcher spruch Jo
han. viij. die letzte handschrift ist / so er auch
den leuten zu gedechtnis inn Bibel geschrie-
ben / vnd dieselbige seine handschrift gen
Ulrich Hans Gasman / dem Sonsteinisch-
en Kendtmeister zukomen / vorn inn ei-
ner Hanspostill / Welchen spruch der liebste
herzliche Vater also ausgelegt.

(Den tod nimmermehr sehen.)

Wie vngleublich ist doch das ge-
redt / vnd widder die offentliche vnd teg-
liche erfahrung / Dennoch ist es die warheit /
Wenn ein mensch mit ernst Gottes wort im
hertzen betrachtet / im gleubet / vnd darüber
einschlefft oder stirbet / so sincket vnd fehret
er dahin / ehe er sich des todes versihet / oder
gewart wird / vnd ist gewis selig im Wort /
das er also gegleubet vnd betrachtet von
hinnen gefaren. Vnter dis war geschrie-
ben

ben / Martinus Luther Doctor. 1546.
geschehen am vij. tag Februarij.

21.17

Als er nun im Herrn verschieden / vnd
Grass Albrecht / sein Gemahl / der von
Schwarzenburg zc. sampt vns erschra-
cken / immer noch schrien / Man solt mit
reiben vnd laben nicht ablassen / thet man
alles was menschlich vnd müglich war /
Aber es ward der leib immer kelter vnd
tödlcher.

Vnd nach dem der todte leib also auff
dem Kugebettlin / bis inn drey viertel stund
gelegen / machet man darneben / von vie-
len federbetten / drey vnterbett / vnd tücher
oben / hart bey dem Kugebett / darein man
ihnen hub / der hoffnung (wie wir alle
wüandscheten vnd betteteten) ob Gott noch
wölt gnade geben.

Da kamen ehe es tag ward / vmb
vier vhr / der Durchleuchte / Hochgeborne
Fürst vnd Herr / Herr Wolff / Fürst zu
Anhalt / die Edlen / Wolgeborenen Gra-
uen / vnd Herrn / Philippus / Johans
Jörg gebrüder / Grass Volradt / Grass
Hans / Grass Wolff auch gebrüder / Graue
C ij vnd

vnd herren zu Mansfeld / vnd andere herren / vnd vom Adel.

Auff dem bette lies man den Leib liegen / von vieren an bis nach neunem / das ist fünff ganzer stundē / Da viel ehrlicher Bürger kamen / vñ den toden leib mit heissen threnē vñ weinen ansahen / darnach kleidet man ihnen inn ein weissen new Schwebisch kittel / legt die leich inn die kamer auff ein bett vnd strohe / bis so lang ein ziener sarck gegossen / vnd er darein gelegt ward / Da haben ihnen inn dem sarck sehen ligē viel vom Adel / die ihnen das mehrerteil gekand / man vñ weib / etliche hundert / vnd ein sehr gros anzal volcks.

Den xvij. Februarij hat man die Leich inn der herberg / Doctor Trachstets hause stehen lassen.

Den xix. Februarij / vmb zwey vhr nach mittag / hat man ihn nach Christlichem gebrauch / mit grosser ehrwürdigkeit vnd Geistlichen gesengen / inn die Hauptpfarr Kirchen / zu S. Andres / getragen / Da ihn Fürsten / Grauen vnd Herrn / darunter auch Graff Gebhart mit seinen zweien Söuen / Graff Jörgen vnd Christoffel gewes
sen /

sen/sampt ihren Frauentzimmern / vnd ei-
ner sehr grossen trefflichen anzal volcks / bes-
leitet vnd nachgefolget.

Da hat Doctor Jonas / bald / als die
Leich inn den Kohr gesetzt / eine predigt ge-
than / welche excipirt ist / Erstlich vō der per-
son vnd gaben D. Martini. 2 Von der
aufferstehung vnd ewigem leben. Warn-
nung den widdersachern / das der tod wirts-
de krafft hinder sich haben / wider des Sa-
tans Reich / Ober den locum j. Thessa. iij.
Da hat man die nacht vber die Leich in der
Kirchen stehen / vnd mit zehen Bürgern bes-
wachen / lassen.

Als aber auff erfodderung vnser G.
H. des Churfürsten zu Sachsen / die Leich
solte gen Wittemberg gebracht werden
welche die Grauen vnd Herren zu Mans-
feld / auch sehr gern bey sich inn ihrer Herr-
schafft behalten / Aber doch zu gefallen dem
Churfürsten / haben volgen lassen hat man
auff den xx. tag Februarij / welcher war
Sonntag nach Valentini zu frū / aber
eins eine Predigt gethan / die durch M. Mi-
chael Cesium geschehen / auff den spruch /
E iij Esaie

Esaię 10j / *lustus perit & nemo considerat.*

Vnd volgendts zwischen zwelffen vnd einem schlage / hat man ihn widderumb mit aller ehrwürdigkeit vnd Christlichen gebreuchen vnd Gesengen / aus der Stad Eisleben gefürt / Da abermals die obgedachte Fürsten / Grauen vnd Herrn / vnd darneben Graff Gebhart mit zweien Sönen / Graff Jörgen / vñ Graff Christoffel / auch Grauen vnd Herren zu Mansfeld / sampt Graff Gebharts gemahl / vñ ihrem Frauenzimmer (wie dann die selbigen zuvor bey dem Kirchgang auch gewesen) vnd ein grosse anzal volcks / andechtig nachgefolget / vnd bis fürs eusserste thor / mit vielen threnen vnd weinen die Leich beleitet haben / Also ist man mit ihm diesen abend bis gen Hall komen.

Zu Eisleben / ehe diese Kirchen Ceremonien alle gebraucht / haben zwen Maler also das todte angesicht abconterfeit / einer von Eisleben / dieweil er noch im stüblin auff dem bett gelegen / Der ander / Meister Lucas Fortennagel von Hall / da er schon eine nacht im Sarcck gelegen.

Als

Als man ihnen nu aus Eisleben fñret/
hat man auff dem wege von Eisleben fast
auff allen Dörffern geleutet / vnd das volck
aus den Dörffern zugelauffen / man / weib /
vnd kinder / vnd zeichen eines ernstlichen mit
leiden gegeben. Seind also nach fünff vhr
fur Hall komen / Vnd da man etwas der
Stad genahet / da sind auch heraus weit
vber den steinweg / Bürger vnd Bürgerin
entgegen komen / Vnd da man jñ die Stad
thor mit der leich komē / sind die beide Pfarr
her (nach dem der Superattendent / D.
Jonas der Leich nach fur) S. Ulrich
vnd Mauritij / vnd alle diener des Lu-
angelij / auch ein Erbar Rat zu Hall/
sampt einer grossen anzal aller Ratsper-
sonen / auch die ganze Schul / Schulmei-
ster / mit all seinen Knaben / mit gewonlicher
Leich Ceremonien vnd Gesengen entgegen-
gangē / Auch ein gros mechtig volck / darun-
ter vil ehrlicher Bürger / vil matronē / Jung-
frawen / kinder / am eussersten thor entgegen
komen / mit solchem lauten wehklagen vnd
weinen / das wir es dahinden jnn den lez-
ten hindersten wagen gehört. Vnd als
man bey S. Moritz / jnn die gassen / den
alten

Den altē marck hinauff gezogen ist/wie auch
auff der brücken vnd im thor/ein solch gros
gedreng/vmb den wagen der Leich/vnd an
dere gewesen /das man offt hat müssen jnn
gassen vnd auff dem marck stillhalten/vnd
man sehr spat/fast halb sieben / jnn die Kir
chen Unser lieben Frawen zu Hall / komen
ist.

Die Kirch aber zu vnser lieben Fra
wen / ist allenthalben sehr vol volcks gewes
sen / da sie den Psalm / Aus tieffer not / mit
Fleglichen gebrochen stimmen / mehr heraus
geweint/denn gesungen haben/ Vnd wo es
nicht so gar spat gewesen/hett man eine pres
digt gethan / Vnd man hat also eylend die
Leich jnn die Sacristen tragen lassen / vnd
die nacht mit etlichen Bürgern bewachen.

Des volgenden morgens / vmb sechs
schlege / ward die Leiche/wider aus Halle
mit geleute/welche zuvor auch jnn allen Kir
chen geschehen / vnd ehrlicher Christlicher be
leitung/bis fur das thor / abermal wie auff
den abend zuvor bracht/mit beleitung eines
ganzen Erbarn Rads / aller prediger vnd
der Schulen daselbst.

Don

Von Hall ist die Leich gefahren/auff
den Sonntag den xxj. Februarij/gen Bitter/
feld / dahin auff den mittag bracht / Da
auff der grenz / vnd auch im Stedlin die
verordenten vnfers gnedigsten Herrn / des
Churfürsten zu Sachsen / der Heubtmann
zu Wittemberg Erasmus Spiegel / Zu Diez
ben / Gangloff von Heilingen / zu Brehne
Dietrich von Taubenheim / Die zwen Gra-
uen / vnd vns so die Leich geleitet / angeno-
men / vnd den abend bis gen Kemberg
bracht haben / Da man den / beide zu Bitter-
feld vnd Kemberg / mit gewöhnlichen Christ-
lichen Ceremonien / die Leich ehrlich ange-
nommen vnd beleetet.

Des Montags den xxij. Februarij/
haben die Edeln vnd wolgebornen Gra-
uen vnd Herrn / Graff Hans / vnd Graff
Hans Hoier / Grauen vnd herrn zu Mans-
feld (wie sie denn aus Eisleben ongefährlich
mit xlv. gerüsten pferden geritten) fur Wit-
temberg an das Elsterthor die Leich bras-
cht / Da sind bald am thor (wie das
zuuor / aus Churfürstlichem beuehl ver-
ordnet) versamlet gestanden / Rector / Ma-
D gistrj

gistrri vnd Doctores / vnd die ganzelöbliche
Vniuersitet / sampt einem Erbarñ Rat/
vnd ganzer Gemeine vnd Bürgerschaft/
Da sind die diener des Euangelij vnd
Schul mit gewonlichen Christlichen Gesen
gen vnd Ceremonien / der Leich vorgegan
gen / vom Elsterthor an / die ganze lenge der
Stad / bis an die Schloskirchen.

Vor der Leich sind geritten / die obgez
melten verordenten V. G. H. des Chur
fürsten zu Sachsen / vnd obgemelte zweent
junge Grauen vnd Herrn zu Mansfeld / on
geföhlich inn die lxx. pferde / Vnd nechst
nach dem wagen / darauff die Leich gefa
ren / ist sein ehelich gemahl die fraw Doctos
rin / Catharina Lutherin / sampt etlichen
matronen / vff einem weglin hinach gefürt /
Darnach sind seine drey Söhne / Johannes /
Martinus / Paulus Lutheri / Jacob Lüt
ther Bürger zu Mansfeld sein bruder / Jörg
vnd Ciliar Kauffman / seiner Schwester
Söhne / auch Bürger zu Mansfeld / vnd
andere der freundschaft / gefolget. Dar
nach Magnificus D. Rector der löblichen
Vniuersitet / mit etlichen jungen Fürsten /
Grauen

Bräuen / Freiherrn / so inn der Vniuersitet
Wittemberg Studij halben sich enthalten/
Darnach ist der Leich gefolget / D. Grego-
rius Brück / D. Philippus Melanthon / D.
Iustus Jonas / D. Pomeranus / D. Cas-
spar Creutziger / D. Jeronymus / vnd ander
elteste Doctores der Vniuersitet Wittem-
berg / Darauff alle Doctores / Magistri/
vnd ein Erbar Radt / sampt den Ratspers-
sonen / Darnach der ganz grosse hauffe vnd
herrliche mennige der Studenten / vnd dar-
nach Burger-schafft / Dergleichen viel Bür-
gerin / matronen / frawen / Jungfrawen /
viel ehrlicher kinder / jung vnd alt / alles mit
lautem weinen vnd wehklagen / Inn al-
len gassen / auch auff dem ganzen marck ist
das gedreng so gros / vnd solch menge des
volcks gewesen / das sichs billich inn der eil
zuuermundern / vnd viel bekand / das sie der
gleich zu Wittemberg nicht gesehen.

Als man die Leich inn die Schloskir-
chen bracht / hat man die selbigen gegen dem
Predigstul nider gesetzt / Da hat man erst
Christliche funebres cantiones gesungen /
Darnach ist der Ehrwürdige Herr D. D.

D ij Pomeranus

Pomeranus auffgetreten / vnd do vor etz
lich tausent Menschen gar ein Christliche
tröstliche Predig gethan / welche auch wird
an tag gegeben werden.

Nach der Predigt D. Pomeranij / hat der
herr Philippus Melanthon aus sonderlichē
herzlichen mitleiden / vnd die Kirchen zus
trösten / ein schöne Funebren Orationem ge
than / welche albereit im Druck ist ausgan
gen / vnd hernach auch Dentsch wird aus
gehen.

Nach dem die Oratio geendet / haben
die Leich hingetragen / ezliche geleerte Ma
gistri darzu verordnet / welche die Leich inn
das grab gelassen / vnd also zur ruge gelegt /
Vnd ist also das thewer organū vnd werck
zeug des Heiligen Geistes / der leib des Ehr
würdigen D. Martini / alda im Schlos
zu Wittemberg / nicht fern vom Predigstul
da er am leben manliche gewaltige Christ
liche Predigten / fur den Chur vnd Für
sten zu Sachssen / vnd der gantzen Kirch
en gethan / inn die erden gelegt / Vnd wie
Paulus i. Corinth. xv. spricht / Gesehet inn
schwacheit

Schwachheit/das er auffgehe an jhenem tage
inn ewiger herrligkeit.

Zu einem solchen Christlichen abschied
aus diesem elenden leben / vnd zu derselben
ewigen seligkeit / helffe vns allen / der ewige
Himlische vater / so gemelten D. Mar-
tinum / zu dem grossen werck beruffen hat /
Vnd vnser herr Ihesus Christus / welchen
er trewlich gepredigt / vnd bekant / Vnd der
heilige Geist / der ihm widder Bapst / vñ alle
pforten der hellen / solche sonderliche freidig-
keit / grossen mut vnd hertz / durch seine
Göttliche krafft / in vielen hohen kempffen /
gegeben hat .

Wir D. Justus Jonas / vñ M. Michael
Celius / vnd Johannes Aurifaber Vi-
nariensis / obgenant / wie wir bey des löblis-
chen Vaters seligen ende gewesen sind / von
anfang bis auff seinen letzten odem / zeugen
dis fur Gott / vnd auff vnser eigen letzte hin-
fart / vnd gewissen / das wir dieses nicht an-
ders gehört / gesehen / sampt den Fürsten /
Grauen / Herrn / vnd allen die dazu komen /
Vnd das wir es nicht anders erzelet / dann

D iij wie

wie es allenthalben ergangen vnd geschehen.
Gott / der Vater vnfers Herrn Ihesu
Christi / verleihe vns allen
sein gnade/

AMEN.

[Faint, illegible text, likely bleed-through from the reverse side of the page.]



ep
oei



Fig. 5875

M.C.




ULB Halle
003 854 620

3







Vg
3815

Christlichen
im tödlichen Leben
Herrn D. Mar-
tini / durch D.
/ M. Michael
und ander die
lesen / kurz
gezogen.

Wittenberg
Georgen
1570.

D. XLVI

BIOTHECA
KAVIANA

UNIVERSITÄTS-BIBLIOTHEK
HALLE
(SAALE)

